

聖學心法 卷一

[Redacted]

臺灣國家圖書館, NATIONAL CENTRAL LIBRARY, TAIWAN. R.O.C.



2

聖學心法序



朕惟古之帝王平治天下。有至要之
道。詒訓子孫。有不易之法。載於經傳。
為可見矣。夫創業垂統之君。經歷艱
難。其慮事也周。其制法也詳。其立言
也廣大。悉備用之萬世。而無弊。有聰
明睿哲之資。遵而行之。則大業永固。

而四海攸寧。災害不生。而五福攸萃。若夫昏愚懦弱之主。吝塞正路。昧厥鴻猷。沉溺於富貴。狃習於宴安。心志日就於荒淫。根本益見於頽靡。禍亂由茲而起矣。蓋創業實難。而守成不易。求之往迹。昭如指掌。朕承

皇考太祖高皇帝洪基。仰惟肇造艱難。

惕焉省懼。明昭有訓。是儀是式。夫作之於前。則必有以續述於後。不有以繼之。則無以承藉於悠久。雖然。聖帝明王之道。不可尚矣。朕夙夜孳孳。勉求其至。第乏聰敏之資。密察之力。莫能領悟。突與縱觀前代。若唐文皇帝。倡義靖難。定天下于一。躬擐甲冑。以

至履弘基而登璿極。其思患也不可謂不周。其慮後也不可謂不遠。作帝範十二篇以訓其子。曰飭躬闡政之道。備在其中。詳其所言。雖未底于精一執中之蘊。要皆切實著明。使其子孫能守而行之。亦可以為治。終無閔門藩鎮閹寺之禍。詩曰殷鑒不遠。在

夏后氏之世。朕常欲立言以訓子孫。顧所聞者不越乎六經聖賢之道。舍是則無以為教。尚何言哉。故於幾務之隙。采古聖賢嘉言。編輯為書。名之曰聖學心法。以為上智則生而知之。其次則必學而後能學之。之至。則可以為聖人。學不至於聖人。則不足謂

之學。然萬事必根於一心。光明諸心。力求其至。使本體之明。貫通透徹。無毫髮之蔽。裁制萬物。各得其宜。則體周而用備。以是為訓。或庶幾乎其可矣。分為四卷。以君道。父道。子道。臣道。而揭其綱。其下分而為目。有統言者。焉。有專言者。焉。統言之者。以其言之。

廣大。非一事之可名。專言之者。蓋可。以一事而名。如學問。以下是也。夫君人者。尊居九重之上。而統臨萬物之表。智周乎天下。然後能應天下之務。不由學問。則聖功何成。是故。積道于躬。惟勤於教學。畜德于己。多識於前言。必也尊師重傅。講貫以廣其見聞。

治心脩身。涵養以充其器量。大易以
學聚問辨為脩德之首。中庸以學問
思辨為擇善之功。是皆經傳之名言。
聖賢之彝教。循至其極。則可以參天
地而贊化育。錫四海之純福。開萬世
之太平。何莫不本於斯。苟為不然。靜
無所養。動無所施。志為氣奪。心為物

誘。喪其賦予之重。失其稟受之良。眩
瞶而無所知。汗漫而無所得。天下之
治亂係焉。承帝王之緒者。可不加勉
於學問乎。蓋為治莫大於敬天。天者
至尊無對。觀其高高在上。若不吾見。
然無時而不監焉。蒼蒼不言。若不吾
與。然無時而不保焉。天之視聽。相為

感通。人心之敬忽有間。則天命之去留無常。吉凶晦否匪降自天。實由於人。永保天命者。其在於敬乎。若夫天道不言。四時行而萬物生。聖人設教。海宇寧而天下服。天道至誠無息。聖人之道亦至誠無息。天道至公無私。聖人之道亦至公無私。法天之行。體

天之德。則上天眷顧。四海乂安。苟逆天之道。所行差忒。天命去之。人心違之。欲少假延於須臾。焉可得也。天之主宰。謂之帝。陰陽不測。謂之神。海岳川瀆。皆有攸司。凡饗帝祀神。尊祖配天。所以報本反始也。必端慤以盡其誠。齋莊以致其敬。專精其德。以達明

薦則鬼神享之。祭必受福。夫粢盛玉帛所以交神明也。一有不誠。神將吐之。福其未萌。禍且至矣。祀神之義。其可慢乎。祖宗立法。所以為後世也。當敬之守之。不可以忽。繼世之君。謹守祖法。則世祚延長。衰世之主。敗其祖法。則身亡國削。監于成憲。商書之所

以致戒。率由舊章。周雅之所以示懲。取法於先。無有逸豫。承序不昌。未之有也。君人者。以一心而維持天下。心之好惡。不可以不慎也。苟為不慎。示其所好惡於人。則讒諂邪佞。喜利樂禍之徒。得以投其隙矣。而毀譽愛憎。莫得而辨。是故人君之所好。與天下

而同其好。所惡與天下而同其惡。群情之所好而已。獨惡。群情之所惡而已。獨好。是拂天理之公。而徇夫人欲之私。則所蔽者固。而所溺者深。雖欲勿殆。其可得乎。夫禍亂生於怠豫。而治康本於自強。一心之用。周流天地。須臾輒息。則非勤勵。大禹勤勞。功覆

天下。文王勤止。福被子孫。德以服人。宜莫如勤。能勤其力。可以有功。大要在於勉強而已。誠知荒寧懈惰之可。以為懼。則於觀逸遊田之事。自無矣。是故勤則不懈。不懈則身脩家齊。國治而天下平。天下既平。不可不思患。而豫防之。蓋亂生於治。何也。非治之

能生亂也。以其久安而不知戒。故亂生於所忽也。是故天下雖有磐石之安。當常懷墮杙之懼。守滿持盈。居高思危。謹其始。慮其終。則可以保其位。而安其身也。若既危而懼。禍至而慮。不可及矣。蓋事未有不由始微而終著。一火始然。終至燎原。一滴不塞。終

必滔天。可不戒哉。可不戒哉。道德仁義。教化之源。善治天下者。以道德而為郭郭。以仁義而為干櫓。陶民於仁義。納民於道德。不動聲色。而天下化。如流水之赴壑。沛然莫之能禦也。雖然。上者下之表。上以是帥之。則下以是應之。故篤行躬踐。漸磨人心。此德

化之實也。夫內外者男女之位也。男以治外。女以治內。陰陽之義備。而夫婦之道成。明君之為政。必先於正內治。內治脩。則閨門和。閨門和。則倫理正。倫理正。則紀綱不紊矣。自古國家衰亂。皆由內外易位。而尊卑倒置。權溺于中。而言出于閭。教化不明。馴至

乎此。是以咸恒著夫婦之道。二南陳正家之始。男教女順。盛德之至也。自古聖君之為治。必先於親九族。九族既睦。平章百姓。此唐堯之德也。夫睦親者。人道之大者也。不違其所親。則宗族之義全。是故建邦樹屏。必於親戚者。重維翰之寄也。昔周道隆盛。詩

有行葦之詠。書有展親之言。其祚之遠也宜哉。民者國之根本也。根本欲其安固。不可使之凋敝。是故聖王之於百姓也。恒保之如赤子。未食則先思其飢也。未衣則先思其寒也。民心欲生也。我則有以遂之。民情惡勞也。我則有以逸之。教之樹藝而使之不

失其時。薄其稅歛而用之。必有其節。如此則教化行而風俗美。天下勸而民心歸。行仁政而天下不治者未之有也。致治之要。以育才為先。化民成俗。以學道為至。學不至道。則不足以成才。是故養士必有其素。求賢必得其效。苟不養士而欲得賢。是猶不耕

耨而欲望秋穫。不雕鑿而欲望成器。故養士得才。以延學立師為急務也。任人之道。當擇賢才。擇之審。則用之精。故輕重得宜。小大無失。是故聖君之用人。必取信於衆論。不偏聽於一人。一人之心有好惡。衆人之議合至公。人皆曰賢。用之可也。一人曰賢。察

之可也。取之至公。用之至當。不以私昵而妨賢。不以非賢而曠官。故善用才者。如百工之用器。各適其宜而已。若夫航滄海者。必菽山之舟。馭千里者。必籬雲之驥。佐治理者。必出衆之才。知其果賢矣。聽之勿疑。則可以養其忠亮。授之以事。則可以責其成功。

夫賢才在位。則不賢者遠。官皆稱職。而庶事成康。苟為不然。求之不精。而擇之不審。賢不肖混淆。而事之成敗。國之治亂。於此而分。故用人之道。無他。公而已矣。人君日總萬幾。事難獨斷。必納言以廣其聰明。從善以增其不及。虛心而聽。不惡切直之言。寬大

有容。以盡謇諤之諫。故數澤之大者。以其能容也。君德之聖者。以其聽諫也。是故樂聞讜言。則忠直者進。樂聞巽言。則諛佞者入。忠鯁之言。雖若難聞。其猶藥石。可以愈病。巽順之言。雖若易聞。其猶蠱毒。終必害物。朝夕納誨。此賢君之盛德。詢于芻蕘。此先民

之至言。况夫人君居至尊之位。苟不
謙已和顏以接群言。則臣下雖有直
言不敢進矣。故聽言者國家之大福
也。衆言日聞。則下無蔽匿之情。中無
隱伏之禍。而朝廷清明。天下平治矣。
若夫庸主則不然。好諛而喜佞。拒諫
而飾非。恣其志之所為。極其心之所

欲。享重祿者固榮而保位。居下僚者
懼罪而畏誅。緘默不言。身日壅塞。俱
蹈敗亡。可勝惜也。夫言有似是而非。
貌有似真而偽。人君不可不辨也。君
子則處心公正。表裏如一。小人則用
情私邪。險陂傾側。當審其邪正。慎其
用舍。果為君子。則親而任之。果為小

人則斥而遠之。是故去草萊。所以長
嘉苗。除奸邪。所以樹正直。然自古忠
邪難辨。惟明君則能識之。何也。明君
之心。公以正。君子之心。有所合。而偏
邪之人。無自而入。譬鑑之公。而衡之
平。物之妍媸。輕重。有不能隱矣。惟昏
主則不然。以聚斂者為足以稱其欲。

巧佞者為足以悅其心。膠固而不移。
糾結而不釋。如是則忠正者不得入。
小人進而君子退。欲國不危。豈可得
也。夫禮者。治國之紀也。樂者。人情之
統也。是故先王制禮。所以序上下也。
作樂。所以和民俗也。非禮。則無以立
也。非樂。則無以節也。教民以敬。莫善

於禮教民以和莫善於樂禮樂興則
天地泰而君臣正刑罰中而長養遂
故曰禮樂刑政四達而不悖則王道
備矣治天下者必先於脩禮樂夫天
地者尊卑之位也君臣者貴賤之等
也尊卑之義明貴賤之等辨則天地
定而陰陽和人倫序而名分正是故

聖王之於天下也不使卑踰尊賤陵
貴小加大庶先嫡君君臣臣父父子
子各得其所而禮義立孔子論為政
必先於正名春秋紀王法必嚴於謹
分治天下者必明乎此則君臣正父
子親夫婦別長幼順上以統下大以
維小卑以承尊賤以事貴則朝廷之

義明而禍亂之源塞矣。人君之於臣下。必遇之以禮。待之以誠。不如是。不足以得賢者之心。夫君不獨治。必資於臣。敬大臣。非屈己之謂也。以道在是。而民之所觀望者也。是故待下有禮。則天下之士鼓奮而相從。待下無禮。則天下之士納履而遠去。故叢茂

者鳥薮焉。淵深者魚萃焉。禮蕃者賢士歸焉。賢士歸。則百姓戴焉。如是而治道不彰。禮樂不備。教化不成者。未之有也。人君以天地為心。則賞罰必得其當。人君不以賞而私於所愛。則必以待有功。不以罰而加於所惡。則必以待有罪。夫賞以旌善。罰以懲惡。

賞當功。則人勸。罰當罪。則人服。執此
之柄而行慶威。非至公至明者弗足
以語。是道。苟吝惜而不賞。則無以甄
有功。縱施而不罰。則無以懲有罪。如
是。則紀綱頽矣。號令隳矣。雖有高爵
重祿。不足以縻賢者之心。雖有嚴刑
峻法。不足以止頑暴之惡。故賞罰者

明君之所慎重。而不敢以忽也。刑者
聖人制之以防奸慝也。使民見刑而
遠罪。遷善而改過。是故刑雖主殺。而
實有生之道焉。何也。蓋禁奸革暴。存
乎至愛。本乎至仁。制之以禮。而施之
以義。始也明刑以弼教。終也刑期于
無刑。先王之敬用五刑也。一則曰欽。

二則曰慎。以見用刑之不敢以輕。故天下無濫獄過殺。而民罔不協于中。所以久安極治也。至若秦隋之君用法慘酷。倚苛暴之吏。執深刻之文法。外加法。刑外施刑。曾何有忠愛惻怛之意。死人之血。漂流于市。受刑之徒。比肩而立。此仁人君子之所以痛傷

也。故殺人愈多。而奸愈作。獄愈煩。而天下愈亂。失四海之心。招百姓之怨。曾未旋踵。而身亡國滅。子孫無遺類。是皆可為明戒。用刑之際。其可不加詳審。而敬慎之哉。經國家者。以財用為本。然生財必有其道。財有餘。則用不乏。所謂生財者。非必取之於民也。

愛養生息使民之力有餘。品節制度。致物之用不竭。下有餘則上何患於不足。下不足則上何可以有餘。故曰財聚則民散。財散則民聚。世有不知此者。用培克之吏。銖銖而取之。寸寸而斂之。剥民之膏。竭民之髓。以悅其上。謂之曰能增羨於財用者。是欺其

君也。善乎君子之言曰。民者邦之本。財者民之心。其心傷則其本傷。其本傷則枝幹凋瘁。而根抵蹙拔矣。理財用者可不鑒於斯人。君富有天下。亦必量入為出。守之以節儉。而戒慎於奢靡。是故茅茨土階。堯德之所以欽明也。惡衣菲食。禹功之所以無間也。

盛世之君常存節儉不浸淫於嗜欲。不驕盈於富貴。故天下靖安。四海蒙福。若夫衰世之主。極財用之費。窮耳目之好。股民膏血。暴殄天物。民怨於下而不恤。天怒於上而不懼。欲國不亡。烏乎可得。馭夷狄有道。謹邊備是也。嚴關防。守要害。脩封域。明斥堠。務

農講武。養威蓄銳。此之謂也。其來侵犯。則有以禦之。其來歸服。則有以處之。毋先事以起釁。毋貪利以徼功。起釁徼功。損財耗力。中國罷弊。職此之由。大抵夷狄之性無常。強則叛。弱則服。聖王馭之之道。不威以威。而惟懷以德。厚之以仁。而待之以信。不以其

歸順也。而施邊防。不以其衰微也。而忘講武。是以內治外安。四夷賓服。夫兵者。聖人制之。以備不虞也。蓋不得已而用之。故曰。先王耀德不觀兵。然除暴救亂。四征不服。奉行天討。以安百姓。必先用武。故黃帝有涿鹿之戰。夏后有甘扈之誓。武王有牧野之師。

及天下既平。戢戈橐矢。誕脩教化。以訖四海。必先用文。若大禹之敷文教。成湯之修人紀。有周之陳常道。是故不可以武而廢文教。亦不可以文而弛武備。文武並用。長久之術。夫兵不可以黷。黷則玩。玩則敗。苟不察國之虛實。不謀敵之強弱。而惟戰是務。則

國危矣。聖王之治兵也。教之以禮義。使民知親其上。如子弟之衛父兄。手足之捍頭目。致死而不畏危也。用以征伐。則勢出萬全。故曰。技擊不足以遇武卒。武卒不足以直銳士。銳士不足以當節制。節制不足以敵仁義。五常之道。父子至親。父子者人倫之至。

也是故為人父。止於慈。所以愛其子。必導之以禮樂。勗之以敬義。養之以德行。夫芝蘭生於階庭。而馨香播於戶外者。培植之力至也。子弟成其德性。而孝敬達於遐邇者。訓迪之功至也。苟溺愛以為慈。姑息而不教。是敗其子矣。子之事親。以孝為本。孝者順。

德之至也。以一身之孝而率天下以孝。則不令而從。不嚴而治。故曰孝子之至。莫大乎尊親。易曰。家人有嚴君焉。孔子曰。孝莫大於嚴父。嚴父莫大於配天。又曰。仁人之事親如事天。苟不愛其身以忘其親。則不謂之孝矣。惟能善繼善述。不改先志。此孝道之

實者也。夫君者元首也。臣者股肱也。君統乎臣。臣輔乎君。匡弼左右。務引君以當道。責難陳善。毋陷君於有過。克己奉公。以盡其職。正心脩德。必先愛人。勿矜其能。勿伐其功。毋以不肖而妬賢。毋以陰險而賊善。毋恃恩以要譽。毋弄權以作威。毋憚譎以逞奸。

欺毋驕恣以成怠傲。小心畏慎恭儉
和柔。不枉道以徇人。必正己以守道。
致其君為堯舜之君。致其民為堯舜
之民。如臯夔稷禹為名世之臣。豈不
曰盛哉。是故抗節守義。莫大於忠。受
君之爵。食君之祿。當憂國如家。忘身
徇國。不避艱險。不計利害。堅其志操。

確乎其不可以易者也。若夫勵勤以
事上。廉潔以檢身。謙謹以守法。勤則
不懈。廉則不汙。謹則免禍。歷觀人臣
之取敗者。未有不由於懈怠貪汙恣
肆者也。故曰為君難。為臣不易。為吾
臣者尚慎旃哉。凡前諸事。吾既集聖
賢之言以為訓。於正心脩身齊家治

國平天下之要道。大畧已見于是。自昔聖帝明王。賢士君子。或生而知。或學而至。故其言之微妙。皆切於日用。而不可離也。吾子孫誠能遵而行之。足以為治。吾揆功微。德薄。智淺。才疏。邁屯履難。危而後安。回慮却顧。寤寐戰兢。負荷鴻基。惟恐失墜。恒思天下

大器也。保之為最難。善保之則完。不善保之則壞。一有瑕璽。則敝裂隨之。是以早朝晚息。弗敢怠豫。以承天休。且富有四海。何欲不遂。何求不得。然欲不可縱。心不可侈。欲縱則易至於怠荒。心侈則必至於危亡。故以道制欲。以理制心。庶幾寡過。由是仰思俯

察默識潛探。求古聖賢之道。以資已善。後自匪生知之質。復歎學知之功。徒云希聖望而未見。不能造詣其極。道無足以詒謀。言不足以爲訓。姑述其近似者。以序于篇端。使吾子孫先觀吾言。然後觀是編。不觀吾言。則無以見吾之用心。不知吾之用心。則不

能窺聖賢之閫奧。非欲其取法於吾言。實欲其取法於聖賢之言也。取法於聖賢。則萬世而無弊。此吾之所以惓惓致戒於子孫者也。於乎。吾以是而遺子孫者。盖久安長治之道。後世能守吾之言。以不忘聖賢之懿訓。則國家鮮有失道之敗。盖天命無常。惟

德是與。惟能脩德以合天心。則天命眷顧。久而益隆。成周綿祀八百。以文武成康。世世脩德。宥密基命。毋敢或懈。故詩曰。世有哲王。又曰。世德作求。為吾子孫者。其可不思天命之無常。以脩厥德。保厥位。永宗社之慶於悠久者乎。讀是編者。其敬之哉。其懋之

哉

永樂七年五月望日序